

calloso-elevatis; postice conjunctim rotundata, thorace quadruplo longiora, dorso depressa, sat fortiter rugoso-punctata, lineis duabus longitudinalibus elevatis oblitteratis. Corpus subtus modice convexum, pectore crebre abdomineque parcius granulatis. Pedes breviusculi, dilutius piceo-ferruginei, pilis longis, griseis, adpersi.

10. *Zamium 4-signatum*: oblongum, nigro-piceum, nitidum, griseo-pubescentius fuscoque pilosum, supra rugoso-punctatum; thorace dorso fasciculoso-tuberculato, elytris singulatim testaceo-bipustulatis. Long. 15, lat. 4 millim.

Caput latitudine vix brevius, sat crebre rugoso-punctatum, fronte subimpressa; oculi majusculi, fortiter granulati, profunde emarginati. Antennæ medium elytrorum nonnihil excedentes, concolores, pilis longis griseis adpersæ, articulis basalibus scabris. Thorax latitudine media paullo brevior, basin versus angustatus, intra basin subconstrictus, ante medium rotundato-amplius, antice posticeque truncatus, dorso depressus, sat crebre rugoso-vel granulato-punctatus, griseo-villosus, margine antico tuberculisque quatuor in disco, duobus scilicet ante medium, totidemque posterius, magis distantibus et obsoletioribus, umbrino-fasciculosis. Scutellum breve, apice subrotundatum, dense albido-tomentosum. Elytra linearia, basi thoracis duplo latiora, humeris elevatis; postice conjunctim rotundata, thorace quadruplo longiora, parum convexa, sat fortiter rugoso punctata, pube grisea, pilis erectis fuscis immixta, adpersa, singulatim maculis duabus parvis, rotundis, flavo-testaceis, una in medio, altera ante apicem, notata. Corpus subtus modice convexum, pectore crebre abdomineque parcius tenuiusque granulato-punctatis. Pedes mediocres, concolores, griseo-pilosi.

11. *Xystrocera* (AUD. SERV.) *dispar*: elongata, subtus fusco-ferruginea, griseo-pilosa; thorace supra viridi, plagis variis testaceis; elytris granulato-punctatis, glabris, testaceis, vitta discoidali margineque coeruleo-virescentibus. Long. 20—24, lat. $4\frac{1}{2}$ —5 millim.

♂ Caput longitudine duplo latius, ferrugineum, punctatum, tenuiter flavo-griseo-pubescentius, fronte transversim valde convexa, linea media longitudinali, tenui, insculpta; oculi lunati, modice convexi. Antennæ corpore fere dimidio longiores, sat validæ, articulis 4 basalibus scabris, piceo-nigris, reliquis fusco-ferrugineis. Thorax latitudine vix brevior, intra basin apicemque subconstrictus, antice fere truncatus, postice medio late rotundatolobatus, subtus fusco-ferrugineus vel virescens, supra lætius viridis, crebre et subtiliter ruguloso-punctulatus, dorso depressus, tenuiter canaliculatus, plaga furcata impressa, a basi ultra medium extensa, testacea, flavo-griseo-tomentosa, adjacentibus lituris tribus parvis ejusmodi versus latera utrimque, plagæ dorsali proxima, ovata, distinctiore. Scutellum subtriangulare, fusco-

virescens, griseo-pubescent. Elytra thorace fere quadruplo longiora, antice medio thoracis haud latiora, retrorsum sensim leviter attenuata, apice singulatim rotundata, dorso subdepressa, ubique sat crebre granuloso-punctata, dilute testacea, subopaca, vitta longitudinali in disco, jam integra, jam ante apicem abbreviata, margineque obscure viridibus, lineis tribus longitudinalibus dorsi elevatis plus minusve distinctis. Corpus subtus convexum, coriaceum, fusco-ferrugineum, flavo-griseo-pilosum. Pedes sat elongati, nigri aut picei, nitidi, parce griseo-pubescentes, femoribus pedunculatis, versus apicem clavatis; tibiis compressis; tarsis ferrugineis.

♀ differt antennis tenuioribus, corpore vix longioribus; thorace elytris distincte angustiore, dorso remotius granulato-punctato, signaturis testaceis non impressis, fere glabris. elytrisque linearibus.

Variat vertice infuscato antennisque totis ferrugineis.

12. *Xystrocera semilunaris*: oblonga, ferruginea, supra opaca, subtus nitida tenuiterque pubescens; thorace piceo, dorso lunula impressa, testacea; elytris dilutius ferrugineis, margine anguste infuscato. Long. 13, lat. 3 millim. ♂.

Caput longitudine duplo latius, rufo-ferrugineum, subtiliter punctatum, fronte transversim elevata, medio distincte sulcata; oculi mediocres, profunde emarginati. Antennæ corpore fere duplo longiores, subsetacæ, ferrugineæ, basi obscuriores. Thorax subtransversus, antice fere truncatus, postice medio nonnihil rotundato-productus, lateribus subæqualiter rotundato-amplatis, supra parum convexus, subtilissime coriaceus, fusco-piceus, indeterminate ferrugineo-variegatus, lateribus antice submetallicomicantibus; dorso leviter canaliculato, medio arcu dilutiore, tenuiter pubescente, insculpto. Scutellum semi-ovale, impressum, ferrugineum. Elytra thorace vix quadruplo longiora ejusdemque medio non latiora, sublinearia, apice singulatim rotundata, dorso depressa, antice crebre, postice remotius granuloso-punctata, dilute testacea, margine laterali apiceque anguste infuscatis; lineis tribus dorsalibus elevatis, postice abbreviatis, plus minusve distinctis. Pedes quoad formationem ut in specie antecedente, tenuissime griseo-pubescentes, ferruginei, femoribus, præter basin, piceis.

13. *Coelodon* (AUD. SERV.) *rusticum*: elongatum, nigro-piceum, griseo-sericeo-pubescent, fronte sulcata, thorace transversim plicato; elytris castaneis, nitidis, apice muticis. Long. 39, lat. 11 millim. ♀.

Caput longitudine haud latius, coriaceum, fronte profunde sulcata, ad basin antennarum utrimque tuberculo prædita; oculi fere divisi, fortiter granulati. Antennæ sat validæ, medium elytrorum paullo excedentes, articulis 3—5 subnodosis, 6—10 subcompressis, apice interne angulatis. Thorax latitudine baseos